

O Río Miño transfronteirizo contará cun Plan de Mobilidade Sustentable centrado nos desprazamentos entre as eurocidades

□ Pulsa para escoitar

A AECT Río Miño destacou que esta é a fronteira máis transitada da península ibérica e un dos primeiros plans “transfronteirizos” do mundo

O estudo abranguerá 26 municipios e máis de 3.300 km²

O territorio do Río Miño Transfronteirizo contará cun [plan de mobilidade sustentable](#) que favoreza os desprazamentos de persoas e vehículos na fronteira galego portuguesa, prestando especial atención aos fluxos entre os polos urbanos das eurocidades, nos que se concentran máis de 100.000 habitantes. Así o anunciou hoxe o deputado de Cooperación Transfronteiriza e director da AECT Río Miño, Uxío Benítez, nun acto no que estivo acompañado polos alcaldes da eurocidade Tui – Valença, Carlos Vázquez Padín e Jorge Salgueiro Mendes, e o presidente da cámara municipal de Vila Nova de Cerveira e vice director da AECT Río Miño, João Fernando Brito Nogueira.

Segundo explicou o director da AECT Río Miño “este plan supón unha necesaria visión global da mobilidade”, coa característica especial de “ser un plan tranfronteirizo, un

dos poucos deste tipo que existen no mundo”. Benítez lembrou que xa se están redactando plans de mobilidade a nivel galego, comarcal e nos concellos, pero “parece que do outro lado do río Miño non hai nada, a pesar de que estamos a falar da fronteira ibérica máis transitada”. Neste senso o director da AECT Río Miño destacou que “nós queremos rachar por completo con ese concepto de fronteira, e queremos realizar un diagnóstico que nos dea unha visión máis acertada desta área xeográfica, que é un territorio común.”

Punto de partida

O Plan de Mobilidade Sustentable do Río Miño Transfronteirizo (PMST) é unha das principais accións do proxecto Smart Minho - enfocado na planificación conxunta e intelixente do espazo transfronteirizo e cofinanciado ao 75% polo Fondo Europeo de Desenvolvemento Rexional- .

O PMST terá como punto de partida dous documentos previos: a ‘Estratexia do Río Miño Transfronteirizo 2030’ e o ‘Plano de Transporte Público do Vale do Rio Miño Transfronteirizo’, un detallado traballo elaborado por UNIMINHO en 2012.

“A participación cidadá xogará un papel importante no deseño deste plan” que se levará a cabo mediante a realización de enquisas, tanto a pé de rúa como a través da páxina web de Smart Minho, e a organización de varios obradoiros, en territorio galego e portugués, nos que “o tecido asociativo e económico do territorio poderá achegar tanto ideas como as problemáticas ás que se enfrontan no seu día a día en materia de mobilidade”.

Especial énfase nas eurociudades

O plan estudará especialmente a mellora dos desprazamentos entre os tres pares de núcleos urbanos que compoñen as eurociudades de Tomiño – Cerveira, Tui – Valença e Salvaterra – Monçao, que aglutinan un tercio do total da poboación do territorio. Nesta liña se manifestaron os representantes das

alcaldías e cámaras municipais presentes, agradecendo os esforzos realizados pola Deputación de Pontevedra na área transfronteiriza para fomentar o traballo en común do territorio galego portugués.

O estudo abrangue máis de 3.300 km² de territorio, inclúe a 26 municipios galegos e portugueses, e a unha poboación de ao redor de 376.000. Unha vez recompilada e analizada toda a información obtida a través das enquisas e obradoiros, poderanse extraer as primeiras conclusións e establecer unha visión global do conxunto da mobilidade na área do río Miño transfronteirizo, cunha proposta de accións piloto lista para desenvolver no inmediato, segundo informou o deputado.

Smart Minho promoverá a recuperación do patrimonio inmaterial galego-portugués a través da iniciativa ‘O Miño: un río de tesouros’

[☐ Pulsa para escoitar](#)

O traballo realizarase en colaboración coa Asociación Cultural e Pedagóxica Ponte... Nas Ondas, consultora acreditada pola UNESCO, con 20 anos de experiencia

A Deputación de Pontevedra, a través do proxecto Smart Minho,

vén de poñer en marcha a iniciativa 'O Miño: un río de tesouros', un traballo de recuperación da memoria cultural galego- portuguesa no territorio do val do río Miño. A acción ten por obxectivo poñer en valor o patrimonio inmaterial transfronteirizo, así como garantir a súa transmisión ás novas xeracións. O estudo realizarase en colaboración coa Asociación Cultural e Pedagóxica Ponte... nas Ondas!, unha das 176 entidades acreditadas en todo o mundo pola UNESCO como consultora, a única en Galiza, con máis de 20 anos de experiencia no estudo do patrimonio inmaterial transfronteirizo.

A pesar da fronteira política que durante séculos separou ao Val do Miño en dous estados, a poboación do territorio seguiu compartindo unha cultura común que se transmitiu de forma oral, xeración tras xeración ata os nosos días, e que constitúe parte da identidade propia deste territorio. Algúns destes coñecementos e sabedorías atópanse a día de hoxe en perigo de desaparecer e seguen vivos unicamente a través de persoas, normalmente de avanzada idade, que son capaces de recordalos e recrealos e por esta razón supoñen un referente para a comunidade, os chamados 'tesouros humanos vivos'.

O traballo de campo consistirá precisamente en entrevistas persoais con cada un dos tesouros humanos vivos identificados. Dos arredor de 15 casos que serán estudados, a maioría deles supera os 70 anos, nun dos casos chegando ata os 99, e cada un deles conta con coñecementos pertencentes a un ámbito diferente do patrimonio inmaterial. O proxecto inclúe, así mesmo, a creación dunha base de datos que recompile toda esta información e a realización dun documental, que achegue dunha forma máis visual este traballo ás persoas máis novas e á poboación en xeral.

O patrimonio inmaterial galego – portugués

O patrimonio cultural inmaterial galego-portugués comprende principalmente cinco ámbitos: as tradicións e expresións

orais, como serían os contos, as lendas, as cantigas ou as regueifas; as artes do espectáculo que inclúen por exemplo a danza, a música ou as marionetas; os usos sociais, rituais e actos festivos, que fai referencia a cuestións tan diversas como as romarías, as máscaras tradicionais, os ranchos de reis, os maíos ou os deportes tradicionais; os coñecementos relacionados coa natureza e o universo, onde encaixaría a medicina natural ou a gastronomía; e as técnicas artesanais tradicionais, no que se inclúen as artes pesqueiras ou a olería entre moitas outras.

A Asociación Cultural e Pedagóxica Ponte... nas Ondas! desenvolve dende 2009 a súa actividade de recuperación da cultural inmaterial a través do recoñecemento de 'tesouros humanos vivos' en todo o territorio transfronteirizo, realizando este labor de xeito ininterrompido dende a súa fundación. O seu traballo de recuperación do patrimonio inmaterial a través desta metodoloxía establecida pola UNESCO foi premiada en varias ocasión por entidades nacionais e internacionais.

Smart Minho é un proxecto da Deputación de Pontevedra, a CIM Alto Minho, a Fundación Centro de Estudos Eurorrexionais e a Agrupación Europea de Cooperación Transfronteiriza Río Miño (AECT Río Miño), cofinanciado ao 75% por fondos FEDER.

**A AECT Río Miño reúne coa
Secretaría de Estado da
Valorización do Interior de**

Portugal para tratar os futuros investimentos no territorio transfronteirizo

□ Pulsa para escoitar

Parte do territorio da AECT Río Miño “non só é fronteira, senón tamén interior, o que redunda nunha maior dificultade á hora do seu desenvolvemento”

A AECT Río Miño reuniuse en Portugal co secretario de Estado da Valorización do Interior, João Paulo Catarino, para abordar os futuros investimentos de cooperación transfronteiriza no territorio do Miño, dentro do marco financeiro 2021 – 2027 dos fondos europeos e reivindicar o lugar que o territorio da AECT Río Miño ten que ter dentro dos seus plans de actuación.

Este novo encontro súmase aos xa mantidos nas últimas semanas coa Comisión de Coordinación e Desenvolvemento Rexional do Norte de Portugal e a Dirección Xeral de Fondos Comunitarios do goberno de España, e tamén hai solicitada unha reunión co presidente da Xunta de Galicia, Alberto Núñez Feijoo, sempre co mesmo obxectivo: tratar os próximos orzamentos plurianuais da Cooperación Transfronteiriza europea, e esixir que se cumpran os compromisos adquiridos durante a Cimeira Hispano – Lusa de 2017, celebrada en Vila Real, onde se apostou por reforzar a cooperación nas zonas transfronteirizas, e especificamente no territorio do río Miño.

Durante o encontro de Pedrogão, o director da Agrupación, Uxío Benítez, puido comentar co secretario de estado portugués algunhas das conclusións da Estratexia Río Miño Transfronteirizo 2030. Segundo explicou Benítez, “parte do

territorio da AECT Río Miño enfróntase a un dobre desafío, xa que non só é fronteira, senón tamén interior, o que redunda nunha maior dificultade para estes concellos galegos e portugueses á hora do seu desenvolvemento económico e acrecenta problemas demográficos que podemos atopar en toda a zona fronteiriza”.

“A nosa fronteira é dinámica, e ten enormes potencialidades, pero ao mesmo tempo tamén presenta unha poboación avellentada, unha demografía á baixa e grandes dificultades para fixar a poboación máis nova, que se ve obrigada a emigrar por falta de expectativas, algo que se ve agravado nos municipios do interior – sinalou o director da AECT – polo que os investimentos europeos son cruciais á hora de garantir un correcto desenvolvemento do territorio e unhas condicións de vida dignas para a súa poboación”.

A entidade ten solicitada unha reunión co presidente da Xunta, Alberto Núñez Feijoo, para tratar estas cuestións, así como a proposta de formulación dunha Inversión Territorial Integrada (ITI) no territorio do Río Miño Transfronteirizo.

A Comisión de Coordinación e Desenvolvemento Rexional do Norte de Portugal recibe á AECT Río Miño

☐ Pulsa para escoitar

A entidade amosou a súa preocupación ao respecto da redución de fondos europeos de cooperación transfronteiriza para o período 2021 – 2027

A AECT Río Miño reuniuse esta semana co presidente e a vicepresidenta da Comisión de Coordinación e Desenvolvemento Rexional do Norte de Portugal (CCDRN), Fernando Freire de Sousa e Ester Gomes da Silva, para tratar o marco financeiro 2021–2027 dos fondos europeos e achegarlles as conclusións da Estratexia Río Miño Transfronteirizo 2030. No encontro participaron o director da entidade, Uxío Benítez; o vicepresidente, João Fernando Brito Nogueira, e o secretariado técnico da AECT.

Durante a reunión, Uxío Benítez transmitiu súa preocupación ao respecto da redución de fondos para cooperación transfronteiriza no próximo marco financeiro plurianual dos orzamentos europeos para o período 2021 – 2027, que afectarían directamente aos proxectos desenvolvidos entre a fronteira do sur de Pontevedra e norte portugués. Dende a AECT sinalouse a importancia destes fondos para o territorio transfronteirizo, historicamente menos desenvolvido, e que hoxe en día se enfrenta á problemáticas cruciais como o avellentamento ou a emigración por falta de perspectivas laborais.

Esta mesma preocupación foi transmitida á Dirección Xeral de Fondos Comunitarios do goberno de España, durante a reunión mantida o pasado 11 de decembro, na que foron presentadas as candidaturas promovidas pola AECT Río Miño e a Deputación de Pontevedra á segunda convocatoria do Poctep 2014 – 2020.

Próximas reunións

Así mesmo, o 18 de xaneiro está previsto un encontro co Secretário de Estado da Valorização do Interior de Portugal, João Paulo Catarino, para seguir tratando estas cuestións e a planificación dos próximos investimentos no territorio.

A AECT Río Miño tamén ten solicitada unha reunión co presidente da Xunta, Alberto Núñez Feijoo, para tratar estas mesmas cuestións, así como a proposta de formulación dunha Inversión Territorial Integrada (ITI) no territorio do Río Miño Transfronteirizo.

A AECT Río Miño presenta dúas candidaturas a 2ª convocatoria do INTERREG VA, por un valor global de 3,5 millóns

[□ Pulsa para escoitar](#)

O deputado de Cooperación Transfronteiriza e director da AECT Río Miño, Uxío Benítez, deu a coñecer estes proxectos ante a Subdirección Xeral de Cooperación Territorial Europea

Rede Lab Miño e Visit Rio Minho Plus permitirán completar as accións postas en marcha durante a primeira fase do Interreg 2014 -2020

O deputado de Cooperación Transfronteiriza e director da AECT Río Miño, Uxío Benítez, reuniuse hoxe en Madrid coa subdirectora xeral de Cooperación Territorial Europea da Dirección Xeral de Fondos Comunitarios, María del Carmen

Hernández Martín, para presentarlle os novos proxectos presentados á 2º convocatoria do Interreg VA España- Portugal (POCTEP) 2014 -2020”: Rede Lab Miño e Visit Rio Minho Plus. Benítez estivo acompañado polo vice director do agrupamento, o portugués Fernando Brito Nogueira, e polo secretariado técnico da entidade.

Segundo informou Uxío Benítez, o orzamento global total de Rede Lab Miño e Visit Rio Miño Plus, ascende a preto de 3,5 millóns, que se destinarán a dar continuidade aos proxectos Smart Minho e Visit Rio Minho, que xa se desenvolven na actualidade, e que foron aprobados na primeira candidatura destes fondos europeos. Xunto coa AECT Río Miño, integrada pola Deputación de Pontevedra e o CIM Alto Minho, participan nestes proxectos a Fundación Centro de Estudos Euro Rexionais, o Centro Tecnolóxico do Mar, a Universidade de Vigo e varias cámaras municipais portuguesas.

Á espera da resolución destas dúas candidaturas, Benítez fixo fincapé sobre un dos maiores desafíos aos que se enfrenta a cooperación transfronteiriza, que é “a falta de fondos europeos, xa que os programas para España – Portugal reduciron a súas inversións nas rexións fronteirizas, orientando cada vez máis o seu apoio a territorios afastados das áreas limítrofes o que desvirtúa por completo o sentido destas axudas”, unha reclamación na que se leva insistindo dende a Deputación de Pontevedra en reiteradas ocasións.

Proxectos en execución

Dende o pasado mes de novembro, a AECT Río Miño é socia do proxecto de mellora da eficacia da cooperación institucional, Smart Minho, dende o que se impulsou a elaboración da “Estratexia Río Miño Transfronteirizo 2030” e que tamén inclúe a posta en marcha de diferentes plans piloto de mobilidade e cultura, xestionados conxuntamente entre España e Portugal.

Por outro lado, un dos obxectivos da entidade é promover o Río Miño Transfronteirizo como un destino ecoturístico de

excelencia, a través da posta en valor do seu patrimonio natural e cultural e a creación dunha marca “Río Miño”, que permita dar a coñecer, tanto o territorio, como os seus produtos. Estas liñas de actuación están recollidas dentro do proxecto Visit Río Miño, que tamén contempla a creación dun anel verde de sendeiros transfronteirizos, un gran atractivo para aqueles turistas que busquen destinos de natureza, calidade e non masificados.

Visit Rio Minho e Smart Minho tamén son proxectos cofinanciados polo Fondo Europeo de Desenvolvemento Rexional (FEDER), no marco do programa Interreg VA España- Portugal (POCTEP) 2014 -2020”, neste caso aprobados na primeira candidatura.

Medio milleiro de persoas participaron directamente na elaboración da ‘Estratexia Río Miño Transfronteirizo 2030’

Pulsa para escoitar

O II Fórum do Río Miño Transfronteirizo celebrado en Tomiño supuxo o cumio do proceso participativo da elaboración da ‘Estratexia Río Miño Transfronteirizo 2030’, na que segundo se deu a coñecer esta mañá, participaron directamente preto de 500 persoas. A presidenta da Deputación de Pontevedra, Carmela Silva, e o deputado de Cooperación transfronteiriza, Uxío Benítez, presentes no acto, coincidiron a sinalar o positivo

destes datos e a importancia que a poboación do territorio tivo como protagonista e principal beneficiaria desta iniciativa do proxecto [Smart Minho](#), do que forman parte a Deputación de Pontevedra, o CIM Alto Minho, a Fundación Centro de Estudos Eurorrexionais (FCEER) e a [AECT Río Miño](#).

Máis dun cento de persoas déronse cita neste segundo encontro, onde tiveron a oportunidade de coñecer e debater as primeiras conclusións do traballo de análise do territorio que comezou a finais de 2017. Os diferentes mecanismos postos en marcha, que incluíron cinco mesas sectoriais, unha enquisa online, dous fóruns públicos e numerosas reunións con ata 13 concellos e câmaras municipais, permitiron realizar un traballo profundo e realista.

O director da FCEER e coordinador da elaboración da estratexia, Valerià Paül, enfatizou a importancia de contar cun documento guía coma este xa que “existen poucos territorios transfronteirizos en Europa e no mundo que teñan unha estratexia común, e que teñan claramente unha idea do que queren ser e facer. Ademais, os documentos estratéxicos normalmente están trazados a unha escala dos territorios marcados polos espazos de soberanía dos estados, e neste caso, rompemos con isto”. Tras un ano de elaboración da Estratexia, no que se realizaron máis de 45 entrevistas, Paül asegurou que “neste caso podemos dicir que hai unha vontade moi clara de deseñar proxectos reais e obxectivos, que sexan moi operativos, sendo o turismo un eixo estrutural”. Proba diso son as máis de 80 intervencións e proxectos deseñados durante estes meses, recollidos no Plan de Accións que acompaña ao documento guía.

A segunda ITI transfronteiriza de Europa

A presidenta da Deputación de Pontevedra, Carmela Silva, deu alabanza a este proxecto innovador que ten a poboación do territorio como protagonista e partícipe e sinalou que “no século XXI non podemos deixar de contar coa intelixencia da

ciudadanía neste tipo de proxectos”. Silva lembrou hai 2000 anos “este territorio era o centro da relación económica entre o Atlántico e o Mediterráneo e non a periferia, e que hoxe esta iniciativa da valor e recoñece a nosa posición central, o noso dinamismo e a nosa creatividade”.

O deputado de Cooperación Transfronteiriza e director da AECT Río Miño, Uxío Benítez, resaltou “grazas á Estratexia, por primeira vez temos unha visión do territorio como un espazo único” e anunciou que a AECT Río Miño, “con este documento na man que demostra que sabemos o que queremos e onde queremos chegar” reivindicará que “contamos coas condicións obxectivas para acometer no territorio proxectos piloto de cooperación transfronteiriza en todos e cada un dos concellos e cámaras e ademais, podemos converternos na segunda experiencia a nivel europeo de crear un Investimento Territorial Integrado transfronteirizo (ITI) que permita aplicar fondos europeos desde unha visión global do territorio”.



O II Fórum do Río Miño transfronteirizo celebrarase o 29 de novembro, en Tomiño

□ Pulsa para escoitar

Dende finais de 2017, e como acción principal dentro do proxecto Smart Minho, púxose en marcha a elaboración da 'Estratexia Río Miño Transfronteirizo 2030', un documento guía que marcará as liñas de actuación da cooperación entre o sur da provincia de Pontevedra e o Norte de Portugal durante a próxima década. Para a creación da estratexia foi necesario realizar un estudo profundo do territorio, dende o punto de vista económico, social e político, no que participaron os principais actores galego portugueses de cada un destes sectores cun altísimo grao de implicación por parte de todos eles.

A celebración deste II Fórum do Río Miño Transfronteirizo, que se celebrará no Auditorio de Goián (Tomiño) o vindeiro 29 de novembro supón o cumio deste traballo innovador, xa que existían estudos similares pero non un cunha visión compartida do territorio, e no que a cidadanía tivo a oportunidade de participar, debater e achegar os seus puntos de vista ao documento que se ía elaborando, e polo tanto esta é unha estratexia feita dende a base.

Baixo a coordinación da AECT Río Miño, un equipo de expertos e expertas das 6 unive



rsidades públicas do norte de Portugal e Galiza lideraron este traballo, polo que os resultados contan tamén cun aval académico e tanto a nivel institucional como social o resultado foi moi positivo”, segundo indicou o director da AECT Río Miño e deputado de Cooperación Transfronteiriza da Deputación de Pontevedra, Uxío Benítez. “Realizáronse ata 10 encontros bilaterais entre concellos galegos e cámaras municipais portuguesas e numerosas reunións de traballo no que participaron os diferentes gobernos locais”, engadiu.

Así mesmo, “a elaboración da ‘Estratexia Río Miño 2030’ partiu da premisa de ser un traballo realizado a través da participación cidadá”. Para iso puxéronse en marcha diferentes mecanismos como un “espazo de participación cidadá virtual a través da páxina web smartminho.eu, unha enquisa pública dirixida á toda a poboación do territorio, 5 mesas sectoriais centradas en diferentes temáticas como turismo, cultura, comercio ou mobilidade e a celebración do I Fórum do Río Miño Transfronteirizo, e aínda quedan pendentes dúas mesas sectoriais máis e por suposto, este segundo Fórum, conseguindo

unha participación moi alta”, apuntou Benítez.

Pola súa parte, o alcalde de Vila Nova de Cerveira e vice director da AECT Río Miño, João Fernando Brito Nogueira, lembrou que “o I Fórum foi un éxito de participación pública, cun diagnóstico oportuno para a rexión transfronteiriza, polo que esta segunda edición vai permitir perfeccionar a estratexia, de forma que imos contar cun instrumento con orientación propia, pero tamén imos poder presentar os nosos intereses e reivindicacións á Unión Europea”. Nogueira explicou que “a cooperación transfronteiriza está nos plans, polo menos teóricos, dos gobernos de Portugal e España e coa elaboración deste documento ‘Estratexia Río Miño 2030’ queremos contribuír para avanzar cara á practica, pois somos nós mesmos os que mellor coñecemos este territorio e temos a responsabilidade de definir unha estratexia axeitada que sirva para dar resposta á necesidades sentidas”.

“O obxectivo principal é transformar dúas rexións periféricas nunha única área central. Temos excelentes condicións para sermos un territorio común, cuando naturalmente xa o é, pero hai que superar barreiras burocráticas sentidas na educación, na saúde, na xestión d río Miño, entre outras que soamente cunha actuación supra rexional poden ser superadas”, concluíu o alcalde portugués.



Por último, o director da Fundación Centro de Estudos Euro Rexionais, Valerià Paül,

calificou o proceso de “éxito” e valorou a alta participación e implicación da sociedade civil. Paül adiantou que “tras estes meses de traballo hai moitas modificacións no documento borrador que se presentou no I Fórum, o cal é unha magnífica noticia porque quere dicir que se debateu de verdade, e anunciou que se recolleron preto dun centenar de propostas que formarán parte do ‘Plan de Acción do Río Miño Transfronteirizo 2030’”.

Paül destacou ademais a importancia deste estudo que “non foi realizado por unha consultora, senón que foi debatido e matizado pola sociedade civil” e incidiu en que a importancia do documento á hora de solicitar fondos europeos reside precisamente en saber primeiro que é o que queremos ser, e en que queremos investir eses cartos xa que moitas veces se solicitan axudas sen saber para que fan falla”.

O II Fórum do Río Miño Transfronteirizo, que se celebrará no Auditorio de Goián, en Tomiño, o vindeiro 29 de novembro será

o espazo elixido para aportar os últimos matices á elaboración da estratexia Río Miño Transfronteirizo 2030, que se presentará a en xaneiro de 2019. O Fórum comezará ás 10:30 e rematará ás 14:30 cun brunch/networking. [As inscricións son gratuítas e poden facerse aquí.](#)

A Estratexia de Cooperación Intelixente do río Miño Transfronteirizo enmárcase no proxecto Smart Minho a través do Programa Operativo de Cooperación Transfronteiriza España-Portugal 2014-2020 (INTERREG V-A) e está cofinanciado ao 75 % por fondos FEDER, cun orzamento total de 942.022,47 euros.

II FÓRUM DO RÍO MIÑO TRANSFRONTEIRIZO



☐ Pulsa para escoitar

29 de novembro de 2018

Auditorio de Goián-Tomiño

Organizan: Deputación de Pontevedra, AECT Río Minho, Comunidade Intermunicipal do Alto Minho e Fundación Centro de Estudos Eurorrexionais (FCCER)

Actividade encadrada no proxecto SMART MINHO-ESTRATEGIA DE

COOPERACIÓN INTELIXENTE DO RÍO MIÑO TRANSFRONTEIRIZO,
cofinanciado nun 75 % polo FEDER a través do POCTEP 2014-2020.

PROGRAMA

(hora local)

**10:30 h Recepción de participantes, recollida das
credenciais e documentación**

11:00 h Acto de apertura

Participantes:

- Sandra González, alcaldesa de Tomiño
- Manuel Reigosa, presidente da Fundación Centro de Estudos Eurorrexionais (FCEER) e reitor da Universidade de Vigo
- Carmela Silva, presidenta da Deputación de Pontevedra
- Fernando Brito Nogueira, presidente da Cámara municipal de Vila Nova da Cerveira

11:30 h Inicio da sesión

**MESA: A ESTRATEXIA DE COOPERACIÓN DO RÍO MINHO
TRANSFRONTERIZO 2030**

Presenta e modera: Uxío Benítez, director do Agrupamento

Europeo de Cooperación Territorial do Río Miño (AECT Río Miño), deputado de Cooperación Transfronteiriza da Deputación de Pontevedra

“A participación dos actores territoriais no proceso estratéxico”

Relator: Manuel Rodríguez, técnico da FCCER

“A estratexia para o Río Minho Transfronteirizo 2030”

Relator: Valerià Paül, director do FCCER

12:30 h Pausa para o café

13:00 h Inicio da sesión

**MESA: PROPOSTAS DE FUTURO PARA O TERRITORIO
TRANSFRONTEIRIZO DO MINHO**

Presenta e modera: Fernando Brito Nogueira, vice-director AECT Río Miño, presidente da cámara municipal de Vila Nova de Cerveira

Relatores:

- Xavier Martínez Cobas (Universidade de Vigo)
- José Rio Fernandes (Universidade do Porto)
- Francisco Carballo Cruz (Universidade do Minho)
- Sandrina Antunes (Universidade do Minho)

13:15 h Clausura

- Xosé Lago García, Subdirector xeral de Acción Exterior e de Cooperación Transfronteiriza da Xunta de Galicia
- Esther Silva, vicepresidenta da Comissão de Cooperação Desenvolvimento Região Norte (CCDR-N)
- Uxío Benítez, director da AECT Río Miño e deputado de Cooperación Transfronteiriza da Deputación de Pontevedra
- Jose María Costa, presidente da CIM-Alto Minho

13:30 h Brunch/Networking

[Formulario de inscrición](#)

[Descargar programa](#)

Uxío Benítez presenta en Bruxelas a Estratexia ‘Río Miño 2030’ e esixe que o investimento de fondos

Europeos na fronteira sexa real

□ Pulsa para escoitar

Tras dúas xornadas de traballo, a visita institucional da AECT Río Miño a Bruxelas rematou hoxe cunha serie de reunións co Comité das Rexións e na sede da Dirección Xeral de Política Rexional e Urbana da Comisión Europea (DG Regio) nas que, segundo informou o director da AECT Río Miño e deputado de Cooperación Transfronteiriza, Uxío Benítez, déronse a coñecer os proxectos que a agrupación está desenvolver neste momento, así como os seus plans de futuro, recibindo unha acollida moi positiva por parte dos diferentes estamentos europeos.

Durante os encontros, un dos principais temas tratados foi a necesidade de garantir que “os fondos europeos destinados ao desenvolvemento de territorios transfronteirizos se invistan realmente sobre estas áreas xeográficas, e non a centos de quilómetros delas”, segundo explicou Benítez. A este respecto a agrupación tamén se interesou pola tramitación dos regulamentos que rexerán os fondos do vindeiro marco financeiro 2021 – 2027, reclamando que “estas normativas contemplen a focalización do financiamento en proxectos que se desenvolvan especificamente en zonas comúns transfronteirizas”.

Outra cuestión destacada nas reunións foi a presentación da estratexia “Río Miño 2030”, un estudo profundo do territorio transfronteirizo do río Miño que se vén realizando durante os últimos meses baixo a coordinación da AECT. Uxío Benítez apuntou que tras a elaboración deste documento, que inclúe un paquete de accións a desenvolver no territorio, é necesario “contar cunha ferramenta que permita xestionar do xeito máis eficiente os fondos europeos que recibimos” polo que reclamou a formulación dunha “Inversión Territorial Integrada” (ITI)

para o río Miño.

Pacto europeo polo clima e a enerxía

Tras reunirse con representantes do movemento polo Pacto dos Alcaldes para o clima e a enerxía, a AECT Río Miño anunciou hoxe que promoverá a adhesión dos concellos do territorio transfronteirizo este movemento europeo.

“O combate contra o cambio climático e a busca da eficiencia enerxética serán un dos proxectos clave da estratexia do Río Miño 2030, que se presentará a finais deste mes no II Fórum do Río Miño Transfronteirizo”, adiantou Benítez. “O val do Miño será un territorio eficiente enerxeticamente, comezando por fixar os obxectivos locais de redución de CO2”.

A propia agrupación adherirase ao pacto e promoverá plans de acción de eficiencia enerxética e de redución dos niveis de CO2 en todos os concellos da rexión ao mesmo tempo que prestará apoio técnico na elaboración dos obxectivos, e da creación e monitorización dos indicadores dos citados plans de acción.

A través do Pacto dos Alcaldes, máis dun millar de autoridades locais e rexionais europeas asumiron o compromiso voluntario de mellorar a eficiencia enerxética e utilizar fontes de enerxía renovable nos seus territorios, propóndose superar o obxectivo da Unión Europea de reducir nun 20% as emisións de CO2 antes do 2020.

Uxío Benítez reclama en

Bruxelas un maior financiamento para programas sociais dirixidos á poboación do territorio transfronteirizo

□ Pulsa para escoitar

A delegación da AECT Río Miño que se atopa de visita institucional en Bruxelas reuniuse hoxe con Dirección Xeral de Emprego, Asuntos sociais e Inclusión da Comisión Europea. Durante a xuntanza tratáronse diferentes cuestións relacionadas co financiamento de programas sociais e a comitiva tivo a oportunidade de reunirse conxuntamente cos representantes das Unidades Territoriais de España e Portugal, por petición expresa da AECT.

Durante o encontro, o director da AECT Río Miño e deputado de Cooperación Transfronteiriza, Uxío Benítez, puxo de manifesto a necesidade de contar cun maior financiamento para programas sociais de carácter transfronteirizo que permitan, por unha banda, poñer en marcha iniciativas destinadas á empregabilidade da xuventude, e por outra, tratar o problema do avellentamento da poboación nos concellos da fronteira, con iniciativas dirixidas á atención e mellora da calidade de vida das persoas maiores. Do mesmo xeito, Benítez sinalou a importancia de poñer en marcha programas de fixación da poboación nova mediante o apoio a iniciativas transfronteirizas. “Os programas do Fondo Social Europeo, como o Erasmus ou Programa Europeo de Emprego e Innovación Social (EaSI), deben ser utilizados para a fixación da poboación xuvenil da fronteira”, apuntou.

Por último, a delegación acompañou aos representantes dos concellos de Tomiño, A Guarda e Melgaço, que asistiron a unha xuntanza da iniciativa do Pacto polos Alcaldes, movemento europeo no que participan máis dun millar de autoridades locais e rexionais que asumiron o compromiso voluntario de mellorar a eficiencia enerxética e utilizar fontes de enerxía renovable nos seus territorios, propóndose superar o obxectivo da Unión Europea de reducir nun 20% as emisións de CO2 antes do 2020.

Na axenda de mañá están previstos varios encontros con diferentes representantes da DG Regio e do Comité das Rexións e da Comisión de Cooperación Territorial do Parlamento Europeo.